

01 【學騎車仔】

鄒瑞梅

在僱讀小學一年生個時節，阿爸輒常用自行車載僱去學校讀書。上崎個時節，阿爸大粒汗細粒汗踏到啟氣毋上；下崎個時節，就溜一路下。路個兩片種等歸排個竹仔，還有一頭黃梔仔花¹，風吹啊過來，黃梔仔花個清香，僱到今共樣還記到清清楚楚。

僱盡好坐在後座仔，聽阿爸話天說地，阿爸不時教僱做人個道理，佢講：「大人毋講古，細人仔毋知寶。」兩子爺一路唱歌唸曲，山歌溜天，還有三字經摺弟子規也係僱坐在貨載仔頂學會個。

到僱讀三年生個時節，想愛騎自行車，就拜託阿爸教僱騎。阿爸摺自行車牽到大禾埕，過擎一枝擔竿綁在後架仔，佢講恁樣車仔橫下來個時節，僱就毋會分車仔砑著。阿爸捍等後架仔分僱坐好勢，過教僱兩隻腳踏在腳踏仔頂，大力牯一踏，車仔就行哋。僱個心肝就像「十五個吊桶打水——七上八落」當緊張呢！阿爸在邊脣同僱做膽，佢講：「『知得該孔竅，打得該鬼噉。』較細義兜仔，毋使驚，阿爸在後背同你掌等。」

僱當煞猛練習，全無歇暈，大禾埕緊來緊鬧熱，阿哥、阿姊、老弟、老妹還有隔壁個阿明、阿秀通棚走過來同僱加油，連阿明畜個狗仔也跔在吾車仔後背挨來挨去。恁多人在該看僱騎車仔，做毋得漏氣哦！係跌倒就盡無面子，阿明定著會去學校做報馬仔講分同學笑話僱。

為著無愛分阿明摺同學笑，僱盡拚勢練習。哈哈哈哈哈，無一點鐘久僱就曉騎哩。阿爸同僱講：「還慶哦！毋聲就毋聲，一聲就打爛盞。」阿爸個話正講出嘴，手一放，車仔就橫下來哋，正經還見笑哦！賺痛個，吾手巴掌、腳膝頭都鑪溜皮哋，還痛哦！痛到僱目汁濫汨。

大家都無笑僱，還走兼來關心僱有仰般無？阿明問僱還愛練無？加講個，「趕燒趕熱」哪有毋練個道理？阿爸看僱有增志，過一擺捍等後架仔，分僱騎上自行車，僱盡力牯踏，練到汗流脈落，這擺正經曉騎哩！僱歡喜靈天²，大大聲同阿爸講，等僱大哋，一定愛用這臺腳踏車載阿爸滿哪去奈！遠遠，看著阿爸同大家企在禾埕脣，笑到嘴弛弛仔。

1 黃梔仔花：音 vong^v gi / e\ fa/；黃梔子花。花名。茜草科，黃梔子屬。常綠灌木或小喬木，高約三公尺，花瓣六枚，氣味幽香，初開時為白色，花謝時漸轉為乳黃色。

2 歡喜靈天：音 fon/ hi\ lag\ tien/；欣喜異常。